

Գ .

Թո՛ւխ աչք 'ւ իմ կամա՛ր ուներ, խորվեցիր զիս հերւից ի վեր.
Սպիտակ ծոցիկ ո՛վ տեսեր, խակ ծըծեր որ դեռ չէ հասեր.
Ե՛կ, իմ խակ ու ժուռ ծըծեր, որ նազով մայրըն սընուցեր,
Չայն ալ իմ ծոցն եմ պահել, քո արեւն այլ մարդ չէ տեսեր:

Դ .

Աչերուս խըրատ տըւի քանց հազար ծընող՝ գաւակի,
Թ՛ւրե՛կ որ ի վայր նըստինք, աստընւո՛րըս մեզ չիպիտի:
Աչերս այլ ի յիս ասաց թ՛ ես ըքեզ խելօք գիտէի,
Չաղկէկն որ ի գնալ տեսնու, բե՛ր աչեր որ զինք չիհայի:

Ե .

Խընծորն ի ծառու ճըղին, դու ի քո ժամն ես քաղելու.
Բուրդո՞ ի չար փուշ տընկած, ճար չունիմ ես ի քեզ գալու,
Երթամ ի փըշի դահրէն ու զըրեհ հազնիմ կըռուելու,
Գամ ես հետ փըշին կըռուիմ ու խընծոր քաղեմ խաղալու:

Զ .

Եկան էն խամազ մարդիկն թե՛ «Բե՛ր գթո եարըն մեզ ցըցո՛ւ.
Տեսնենք ի՛նչ սուրաթ ունի, որ արեր գքեզ խել կապելու»:
Իմ եարն ի լուսնի նըման, թուխ ամպի միջին է գալու:

Է .

Կաքուկ մ՛ես երեկ տեսայ, շատ երնէկ զիւր տերն ուր ունի.
Ծոցիկն էր զըզած բամակիկ ու երեսն էր պըպլուկ վարդի.
Պըռկիկըն շաքար մաղեր, շունչըն դեղ էր շատ հիւանդի:

Ը .

Մըտիկ իմ եարին արեք, զիս թողեր է զո՛վ կու սիրէ,
Նըման էն իրացն եղեր որ փողոցն որթոտ կու տընկէ,
Գընտեր չ՛իր սիրեր դու զիս, է՛ր կ՛ասիր՝ «Թարկ գէն, զիս սիրէ՛»:
Յիմայ ես ի քեզ եկայ, դու կ՛ասես թէ «Ինձ չիպիտէ»:

Թ .

Իմ եարս այլ ի դուրս ելաւ, շորորաց ի պաղչան գընաց,
Ձեռքն այլ ի ծառըն ձըգեց, ծառերու ճըղերն երերաց.
Էրաց թէ խընծոր քաղեր, իր ճերմակ ծոցիկն երեւաց.